

الفا جومي

أمي .. عليها السلام

- تزوج أبي من أمي وعندها ١٣ سنة وكان مهرها ١٥ جنية ذهب مجيدي
- كان لي ١٧ شقيق مات منهم ١١
- اتهمتني أمي بقتل أختي التوأم في بطنها قبل ما تتولد
- مات أبي وما فيش في جيبه غير ٣ جنية

Обеикан.ком

أهل زمان يقولوا: الحق حبيب الله.

موسى نبي.. عيسى نبي.. محمد نبي.. وكل حى وله نبي..

وكل من له نبي يصلى عليه..

أنا الفاجومي.. فى سوق الرجال؟.. محض مواطن.. لا اسم ولا كسم.. ولا
سعر.

إنما بقى حسب الأوراق الرسميه وختم النسر.. أنا مواطن كامل الأهليه.

الاسم.. أحمد فؤاد نجم.

الوظيفه.. شاعر.

الديانه.. مسلم وموحد بالله.

النوع.. ذكر.

وفوق دا ودا باتمع بجنسية مصر العربيه.

ولا تتعجب يا صديقى.. إنها إرادته الله.

اللى شفته ح أقوله.. من طقق لسلامو عليكو.

عجبك كلامى؟ اشترى.. وأهل زمان يقولوا.. الشارى كسبان والبايع خسران

- ما عجبكش الكلام؟ بين الشارى والبايع يفتح الله.. وربك رازق البعض من

البعض وغانى البعض عن البعض.

الله يرحمك يا امه.. هى اللى علمتنى اللماضه دى!

كانت واحده فلاحه.. لا بتكتب ولا بتفك الخط - إنما أجارك الله كانت فى

الكلام مكلمه.. بس مش أى كلام - وكانت لما تبدأ ما تنتهيش زى أبريق

العسل اللى ميّل على بزوزه وهاتك يانز:

ما تعرفش كانت بتجيب ده كله منين؟ إشى حواديت على إشى نواذر على

إشى حكيم وأمثال على إشى مواويل فى شكوى الزمان!

لما كان الهوى يبجى سوا كانت تحطنى فى حجرها وتفضل تزقنى لحد ما
أشبع وأرتوى والإش بقى لما كان الوجد يستحكم ويحرك الشجن والمواجع
وتغنى لى.. آه يا وعدى صوت زى هديل اليمام فى عز حر بؤونه الحجر..
سخن ومفرهد وعرقان ومشروخ لكن جواه خيط حرير ناعم ما تعرفلوش
أول من آخر.. يشدك من شراشيب قلبك ويفضل يطوحك فى الهوا «دوخينى
يا لمونه» وبعد الدوخه ينزلك على كفوف الراحه مستحمى ومغسول
بدموعك.

يا حلوانى

بيع الخلاوه اللى عندك

يا حلوانى

عضيته عضه وبننت

مطرح أسنانى

خر العسل يا جميل

وشربته بحفانى

والناس تنقط بفضه

والدهب غالى

وأنا بانقط حيبى

بس بوصالى

يا حلوانى.. بيع الخلاوه اللى عندك

أنا بقى يا سيدى كنت أسمع من هنا وهاتك يا نههه وهاتك يا شنهفه وعباط
لحد ما زورى يوجعنى وعنياً تدغبش وخدودى تولع من لسع مية العين اللى
عامله لها على كل خد مجرى:

وحتى لما كنا بنتخانق ودا كان بيحصل يومياً وبدون أسباب جوهرية.. كانت تبدأ
الموشح بلعن سنسفيل حدود اليوم المنيل بستين نيله اللي هو يوم ٢٢ مايو سنه
١٩٢٩.

كان يوم أسود يوم ما جبتك.. كان صباحه أسود من مساءه.. الصبح وعلى ريق
النوم يا فتاح بلا مفتاح جاني الخبر اللي هو أسود من قرون الخروب قال إيه؟ أبوك
الله يجحمه مطرح ما راح كان عايز يتجوز على..

والنبي ماني مسامحاه ليوم حاشر عزت ابن مريم القادره الفاجره اللي رمت
عيالها لحمه حمرا وراحت الأنيتيه انجوزت حسن أبو مطر البغليط أبو قلايط اللي
كرشه يبيلع مال النبي ويقول مابي.

الضهر وف قوله الله أكبر زعق غراب البين جاب خبر الحاج متولى الطحش المزين
جوز أختي الحزينه اللي جت يا قلب أمها تفرح ما التقتلهاش مطرح واتهجلت يا
كبدى والحنه لسه في إديها.

صفار شمس فرقع وابور الجاز في بطن البت فردوس بنت جارتنا وراحت يا
قلبي شابه تقول للقمر قوم لما أقعد مطرحك.. لكن برضه ماتعظمش على اللي
خالقها وقبل ما يرجعوا من دفتتها جاني الطلق فيك يا مخفى الاسم وبعد حزق
ومزق وهدة حيل نزلت يا مقصوف الرقبه ويا ريتك ما نزلت.. كل عيال المسلمين
بتنزل بدماعها إلا انت اللي تنضرب في كمينك.. نازل برجليك لما كنت حتموتنى..
وبقت ستك سعده الدايه تخبط كف على كف وتقول أدى صحيح الزمن اللي وصى
عليه حسان اليماني وشالونى ع الاستباليه هيللا بيلا وأنا بين الموت والحيا.. لكن ريك
خلق الطب والدوا وخلص روح من روح.. وهناك نزلوا المرحومة.. فلقه القمر أدى
الشعر وأدى الوش وأدى شرطه العين.. سميها فاطنه وهى فاطنه.. أثارها نازله يا
قلب أمها ميته وتلايك أنت اللي قتلتها يا مجرم يا ابن المجرم».

يبقى حسب رواية الست الوالده وبغض النظر عن مجموعة الكوارث اللي

انجمعت لاستقبالى نزل محسوبكم منهم بارتكاب جناية قتل وكمان مش مكفينى..
لأ.. نازل برجلياً.. يعنى نازل ماشى!

وأهو من يومها.. وأنا ماشى.. بلاد الله.. خلق الله.. اتفرج ع الناس والناس تفرج
على.. حاطط همى فى قلبى وكاتم الدم ع القبيح لحد ما جرى ما جرى.. وصلوا
على خير الورى.



أمى جابت تلتناشر بطن.. منهم أربعة مجوز.. يبقى المجموع فى عين العدو
سبعناشر مواطن بالتمام والكمال.

أنا كنت عضو فى انجوز الرابع والأخير من مسلسل حشو وتفريغ أحشاء المواطنه
المصريه هانم مرسى نجم أمى عليها السلام.



السبعناشر مواطن اللى أنجبتهم السيده الوالده بالاشتراك مع السيد الوالد
صفصفوا على خمسه زائد واحد فى عداد المفقودين اللى هو.. على.. والباقى اتكل
على الله وعشان كده كانت المرحومه بتسمينا «فضلة الموت» وكانت فخوره بينا
جداً.. لأسباب لم تتضح بعد.. كانت تتجعص فى مجالس النسوان وتقول بالفم
المليان.. أنا أم الرجاله يا بت.. تقولها بالأظه ولا الأميره فوزيه مرات ملك إيران اللى
كنا بنغنى لهم زمان واحنا عيال:

حسن يا عمر

قوم ارفع العلم

الملكه فوزيه

والملك إيران

داخلين الجمعيه

يحفظوا القرآن

أُمى تبقى بنت عم أبويا محمد أفندى عزت ضابط البوليس الحليوه المعجبانى
البرمجى اللى مقطع السمكه وديلها وملهلب قلوب النسوان ومسهر العذارى فى
المضاجع.. خدها وهى بنت تلتاشر سنه.. حسب روايتها.. شافها وهى بتلعب مع
البنات فى الحاره.. سأل:

- مين البنت البيضه أم شعر أصفر وعيون فيروزي دى؟

قالوا له:

- دى هانم بنت عمك.

قال لهم:

- عمى مين؟

قالوا له:

- عمك الحاج مرسى.

صاحبنا ما كدبش خبر.. على بيت عمه وطلبها منه لا إحم ولا دستور ستى آمنه
اللى كانت زى الأرنه الرومى الرقيقه الجميله ما قدرتش تمسك نفسها ورفعت
صوتها لأول مره فى وش جدى الرهيب:

- البت لسه جاهله يابو عباس.

قال لها:

- الجاهل بكره يكبر يام عباس.

قالت له:

- بس عزت فلأتى وديله نجس يابو عباس.

قال لها:

- ادعى له ربنا يتوب عليه ويهديه يام عباس.

قالت له:

- لا بقی.. یاكلها التمساح ولا یاخذها السفاح.

جدى اعتبر فقره الأخيره من كلام ستي آمنه خروج على النص وأدب الحوار
راح شایل إیده اللی زی المرزبه ورازعها قلم مکومها ع الأرض وراح حاطط رجله
على رقبتها زی الزیر سالم ما عمل مع الأسد اللی کل حماره.. وزعق بعلو صوته:

- ابن عمها یاخذها من ع الجمل یا بنت المزين.



أجمعص عروسه أيامها كان بیندفع فیها خمسسه جنیه.. لكن أمی اندفع فیها
خمسناشر جنیه ذهب مجیدی عدلاً ونقداً.. وفي ظرف أسبوع كانوا جهزوها
وشوروها وعلى بیت العدل دوروها.

وهی بتركب التختروان حضنتها ستي آمنه وقالت لها من بین دموعها اللی نازله
تسح:

- كان بدری عليك یا قلب أمك یا بنتی.. منه لله أبوكی اللی باعك بیعه جزاری.

شخطت أمی زنوبه اللی هی خالتي الكبیره فی ستي آمنه:

- یامه حرام علیکی ما تفسریش فی وشها.

وطبطبت علی أمی وقالت لها:

- یغلبك بالمال وتغلیبه بالعیال یاختی.

وودت وشها الناحیه الثانيه وانفجرت بالعیاط.



الوداع یا عزیه أبو نجم.. اختلطت الزغاریت بالدموع وانحرك الركب الميمون

بالعروسه الطفله هانم أم مرسى وعلى مصر أم الدنيا عشان تعمر وتتمر وتعيش مع جوزها فى التبات والنبات وتخلف له صبيان وبنات.

بعض الناس الطيبين وأولهم ستى آمنه طبعاً كانوا حاطين إديهم على قلوبهم وخايفين ع البت المفعوصه من وحش الغلا الكاسر محمد أفندى عزت الشهير فى عالم النساء بالزناتى خليفه.. وتلاقيه هو كمان كان بيتهيالها إنها حتبقى حمل على كتافه.. بت بقى فلاحه عبيطه لا راحت ولا جت ومحتاجه الرعايه والتغذيه زى أى جاموسه فى زريبه جده الشيخ نجم الكبير المؤسس الأول لعيله أبو نجم الشهيره.

مالحقتش الزمان يروح ولا يبجى وف ظرف سنه كانت البت الفلاحه المفعوصه بقت الست أم على عمده نسوان شارع سيدى المعاليفى بشبرا البلد.. على سن ورمح.. واتحول كازانوف الجبار اللى هو السيد الوالد إلى زوج مطيع.. جداً يفكر ك بالخروف الصومالى المستورد.. عديم القرن والليه.

أولاً: بطل السنكحه ع القهاوى لأنها اتعلمت له سرراً كل ألعاب التسليه من كوتشينه بجميع أنواعها لضومنه عربى وأمريكاني لطاوله وفاجتته بمستوى محترفين وكانت بتتعد كل ليله تغلبه على كل لون يا بطيسطا بعد ما يسرق ويحيص ويزوزغ واحنا بتتفرج على غلبه وحركاته ولعبه اللى مش نضيف ونضحك فى سرنا.

ثانياً: بطل الصرمحه وهجر مجالس الأتس وإخوان الحجر لأنها عملت له عده بيتى وكانت بتجالسه وتجانسه ولأن - الكيف مناقله - كانت بتشاركه صدى رد لغايه ما توصله لمرحله الانسجام التام وهذا هو المراد من رب العباد.

قُصر الكلام.. مسكت فى رقبته زى الأوبه الإنجليزى وفضلت تحبل له وتولد له.. وتولد له وتحبل له.. لحد ما شنكلته بالعيال.

بس الأكاده حطت كتفها فى كتفه وزاملته بشرف وجدعنه واتغربت معاه فى كل بلد راحها ورا أكل عيشه.. من مصر لاسكندريه ومن إسكندريه لطنطا للسويس بلد الغريب وم السويس لبنها العسل ومن بنها ينهى قطر الغربه رحلته بينا فى محطة الوصول الأخيره.. الزقازيق عاصمة الشرقيه «بلدى».

كان المرحوم أبويا سايب سلك البوليس - واتعين في وزاره الماليه ولما وصلنا الزقازيق - استلم عمله «رئيس خزينة المحكمه الكليه بالزقازيق».

بلدنا عزبه أبو نجم تبعد عن الزقازيق ٢٤ كيلو متراً ويمكن ده هو اللي شجع أبويا بيني لنا في العزبه ويمكن تكون كتافه تعبت م الشيله فقال في عقل باله:
- ما تريج يا واد حبتين من همّ المرا والعيال ووجع القلب.

القصد قعدنا في بيت العزبه وقعد هو لوحده في بيت الزقازيق، وكان بيشرطنا بزياراته المفرحه كل يوم خميس بعد الظهر ويقضى معانا الجمعه ويصبح السبت يسافر على شغله.

أنا في الأيام دي كان عمرى حوالى خمس سنوات... يعنى شفت أبويا كويس... كان راجل جميل... زى عود الزان.. وكان نضيف وشلبى حتى وهو لابس الجلابيه السواكيس البيضا.. كان بيبقى زى القمر.. وكان أب شديد الحنان وأحياناً شديد القسوه مره كلنى قلم على سهوه دوشني لأنني كنت ماسك عصفوره من رقبتها ومعلقها!

كنا بنستنى زيارته زى العيد... كان بيبجى محمل بالهدايا الجميله وكان يحطنا كلنا في حضنه ويدي كل واحد هديته والفرح والحنان بينطوا من عنيه.

وكان ليله ما يبجى البيت يتملى ضيوف يتعشوا ويسهرواع البرانده حوالين النار والدخان المغمس والحواديت والقفشات والضحك والانبساط.. وكنت أنا الوحيد بين إخواني اللي مسموح لى أ حضر القعهه وكان أبويا يسلطنى على أى واحد من الضيوف أشتم وأشخط وأنف في خلقته وأبويا يضحك من قلبه وياخذني في حضنه
'مش عارف ليه'



يعنى.. رجعت هانم أم مرسى إلى قواعدها فى عزبه أبو نجم.. البت المقعوصه
اللى خرجت امبارح من الحجله على بيت العدل رجعت النهارده حاجه تانيه.. ما
بقاش اسمها ها نم.. بقت الست أم عبد العزيز بعد ما ضاع منها على البكرى وأول
الفرحه.. ضاع فى السفر والغربه ما عرفتلوش طريق جره.. لكن كان دايماً حاضر
معانا فى حواديتها عن جماله ونباهته وأحياناً فى غناها الحزين اللى كان بيسحرنى
ويكىنى.

أنا شفتها فى القتره دى دارت واستدارت وخرط البنات خرطها على ذوقه..
الشعر الأصفر كاسى صدرها وظهرها زى الشال القטיפه ومبروز وشها اللى كان
لونه بمبى من غير دهان والعيون الفروزي اللى تغرق فيها العين ما تجيبش قرارها
والعود الفارع زى نأز الطرفه.. وفوق دا كله كانت زى أبويا نضيفه ومشلبنه - ما
أعرفش أنا طالع نتن لمين؟

والسؤال اللى لسه محيرنى حتى وقتنا هذا:

- مين ابن الشيطان اللى كان شار عليها تركب سنانها فوق وتحت.. دهب؟

أنا بطبعتى ما بحبش الذهب.. ويبدو إنه هو كان بيبادلنى الشعور.. لكن الذهب
اللى كان فى بق المرحومه لما باعته سنه سنه وضرس ضرس أنقذ بعضنا من المرض
وأنا أولهم وأنقذنا جميعاً من عضه الجوع بعد موت أبويا المفاجئ يوم الجمعة ٨
يوليو سنه ١٩٣٥.

التاريخ ده أنا قريته على حيطة قاعة القرن الجوانى بخط عبد العزيز أخويا الجميل
اللى كان مالى حيطان البيت فى شكل حكم ومواعظ وأحياناً أشعار فى الحب
وشكوى الزمان.. مثلاً:

أفديه إن حفظ الهوى أو ضيِّعاً..

ملك الفؤاد فما عسى أن أصنعاً..

من لم يذق ظلم الحبيب.. كظنه..

حُلُوًّا فقد جهل المحبه وادعى..

أو

إن قل مالى فلا خِلِّ يصاحبني

وإن زال مالى فكل الناس خلانى

فكم عدو لأجل المال صاحبني

وكم صديق بفقد المال عاداني

أو

لو كان الفقر رجلاً لقتلته

أو

القناعه كنز لا يفنى... إلخ

الجمعه ٨ يوليو ١٩٣٥.

يومها كنا قاعدين على مصطبه خالى حسن أبو مهدي.. الرجاله لابسين الهدوم
المزهرة والنسوان لسه شعورهم مبلوله من حمام الصبح.

كان موضوع الدردشه هو المقارنه والمفاضله بين مهارة أبويا ومهارة السيد أبو
دقاق شيخ الغفر فى التيشان والرمايه وأخيراً قال خالى حسن أبو مهدي حسماً
للمناقشه:

- سيد أبو دقاق ابن ليل ما يركب شيخ غفر وشطارته إنه بيصيد فى الضلمه لكن
عزت ابن عمى اتعلم التيشان فى المدرسه وشطارته إنه بيصيد فى النور وهو دا الفرق
بين سلاح الحكومه وسلاح الحراميه والمنسر.

وفجأه سمعنا صوات جاى من ناحية دارنا وضحك خالى حسن وقال:

- دا على أبو سماحه بيضرب بهيه ما هو النهارده الجمعه.

وقال أبو عبد الله ابن عمي «تاجر التموين»:

- برضه خروف يا علي يا بو سماحه.. تضرب ما تضرب برضه خروف. لكن عبد اللطيف أبو مصطفى ما خلصوش كلام أبو عبد الله فسأله:

- طب إنت يا أبو عبد الله تقدر تعمل زيه وتضرب الست نفيسه؟
قال له:

- يا حمار يا بن الحمار ماهو لو نط الليلا دي زي ما كانش بقى فيه حيل للضرب.
وضحك خالي حسن وقال:

- العوض على الله فى الرجاله يا اولاد.. يظهر إننا دخلنا عصر الرخا.
وفوجئنا بأمى زنوبه هاجمه علينا بحله مليانه وراحت دالقه نصها فوقى «نيله زرقا» وهى بتولول وتقول:

- أبوك مات يا يتيم.. يا خراب بيتك يا هانم.. يا شماتة العدوين فيكى ياختى.
جرينا كلنا على بيتنا.. فتشت بعينى على أبويا لقيته نايم ومتمدد على السرير النحاس وعينه مفتحه مطفيه وشففت أمى مرميه ع الأرض مغمى عليها وأمى زنوبه مغرقاها نيله زرقا.. يا سنه سودا يا اولاد.. أبويا مات.

مات محمد أفندى عزت الخليوه المعجبانى البرمجى اللى كان مقطع السمكه وديلهيا وملهلب قلوب النسوان ومسهر العذارى فى المضاجع.. مات فى عز شبابه يا ولده.. مات وهو متوضى لصلاة الجمعة ودا معناه فى رأى زنوبه إنه ع الجنه حذف لكن أمى هانم كان لها رأى تانى.. إنه مات ومفيش فى جيبه غير تلاته جنيه كانوا هما كل التركة اللى فاتها رئيس خزينه محكمه الزقازيق الكليه لولاده الخمسه القصر وأرملته الشابه الجميله الست أم عبد العزيز.



الست هانم مرسي نجم
والدة الفاجومي



محمد أفندي عزت نجم
والد الفاجومي